

四庫全書

史部

欽定四庫全書

平定準噶爾方略正編卷六

乾隆二十年春正月癸巳

命西北兩路將軍尅期進兵

定邊左副將軍阿睦爾撒納等奏言臣等詳詢收服之包沁宰桑阿克珠勒等知哈薩克兵與達瓦齊交戰情形雖未悉果到伊犁與否其已至博羅塔拉地方之信似屬確實至所言達瓦

齊擊敗哈薩克兵現在擁兵七千駐劄伊犁巴  
特瑪車凌帶兵三千在和爾郭斯結壘等語似  
屬荒唐何則若達瓦齊果擊敗哈薩克兵必將  
其得勝之處行知各路應遣使處亦必遣使今  
各處俱無一信則準噶爾潰敗難支可見且和  
洛霍斯至伊犁僅數十里兩軍本非和好而謂  
各結營駐劄益覺難信蓋達瓦齊恐人聞其游  
牧搶掠故特宣言互相對壘以飾耳目看來博

羅塔拉以外已被哈薩克搶掠惟餘集賽布庫  
努特噶勒雜特之鄂拓克人等竭力選兵不過  
六七千之數我軍長驅直入並通信於巴特瑪  
車凌等所居之愛古斯地方仰賴

皇上天威自當迅奏膚功奏入

上諭軍機大臣曰阿睦爾撒納將阿克珠勒等所告  
巴特瑪車凌與哈薩克人衆往征達瓦齊之處奏  
聞可見達瓦齊勢已窮蹙準噶爾業成瓦解之形

若不迅速進兵必致哈薩克倖獲其利著阿睦爾  
撒納度量馬力或五六千或三四千務期奮勇前  
進迅奏膚功先因察達克等為包沁人言所誑即  
行撤兵朕已降有明旨今觀阿克珠勒之言則其  
為欺誑愈見俟達什敦多卜到彼仍遵前旨與察  
達克圖倫楚帶兵前往在阿睦爾撒納所領大隊  
之前另作一隊哨探兵方有裨益仍將達什敦多  
卜與阿睦爾撒納各帶兵若干及何時起程之處

奏聞再朕曾降旨令西路哨探兵聽候北路起程  
日期亦於原定日期之前先行進發今已另諭薩  
喇爾若西路先至博羅塔拉有機可乘則不必更  
候北路倘北路先至亦然如必需兩路合攻則仍  
守候一齊進發總之兩路將軍大臣皆為朕出力  
之人不論孰先孰後惟期尅日成功可傳諭阿睦  
爾撒納等知之復奉

上諭曰阿睦爾撒納奏到朕已諭令速即帶兵前進

著并諭薩喇爾扎拉豐阿鄂容安等遵旨辦理但朕所微慮者巴特瑪車凌係阿睦爾撒納之兄現在力量稍強恐達瓦齊被伊擒獻阿睦爾撒納因此恣意不可不慮何如我兵擒獲更足示威薩喇爾等努力為之見阿睦爾撒納時毋露此意

申諭擒解背叛逃人巴朗等

上諭軍機大臣曰巴朗等負恩逃叛情甚可惡即使窮蹙來降究非投誠可比現在伊父策凌孟克在

西路進兵或巴朗逃避額林哈畢爾噶至伊父前  
懇求藉稱招撫希圖寬宥亦未可定著傳諭薩喇  
爾一聞巴朗等消息即撤回策凌孟克另派精兵  
擒拏則伊等無可藉口擒獲時即將巴朗孟克特  
穆爾等為首之人解送來京其所屬人等酌量派  
人管轄具奏請旨

甲午

定邊左副將軍阿睦爾撒納等疏奏籌辦進剿



官兵馬駝事宜

阿睦爾撒納等奏言現在軍營馬三萬九千餘匹駝四千餘隻內可給官兵之駝計二千七百餘隻臣等欽遵

諭旨酌添兵一千入於哨探兵隊內共兵六千名所有駝隻雖不足辦給六千官兵然額林沁多爾濟所買之駝現在陸續送到於進兵時不致有悞務於二月十五內領兵前進至各處應行解

送及採買馬匹到時可以添兵幾千之處臨時  
再酌量辦理陸續起程再議派六千兵內除臣  
阿睦爾撒納將厄魯特兵二千八百三十名俱  
行帶往外派出察哈爾兵一千名和托輝特兵  
五百名扎哈沁兵三百名其一千三百七十名  
即於喀爾喀兵內揀選添補所有官兵應得糧  
馬等項交舒赫德等照新定之例辦給其安設  
臺站處自阿爾台以外臣等遵

旨令厄魯特喀爾喀一同安設至屯田綠旗兵三百  
名喀爾喀兵七百名厄魯特兵一百名俟農具  
籽種到時亦於哨探兵起程後陸續令其前進  
奏入報

聞

乙未

申諭將軍班第等軍前事宜

上諭軍機大臣曰前色布騰巴爾珠爾奏稱阿睦爾

撒納曾言瑪木特係軍威收服與傾心降附者不  
同乞將伊在哨探兵內領兵之處停止朕因降旨  
在前忽爾中止啟其疑心隨即批示曉諭今據阿  
睦爾撒納奏稱二月十五日內兵即前進瑪木特  
於正月十七日始自京起程斷難馳赴朕思阿睦  
爾撒納自到軍營諸事盡心辦理井井此次進兵  
唯伊是賴瑪木特之去否原屬無關緊要若既到  
軍前自不便不令其前往今已遲延不能同進伊

自不妄生疑慮原派扎哈沁兵三百名仍著阿睦爾撒納帶往再額爾齊斯屯田兵前命努三帶往今努三已解任著以塔爾瑪善代之親王成袞扎布向請効力軍前朕原派往額爾齊斯屯田著仍派伊前往辦理原定屯田兵丁僅派策凌等數十人及喀爾喀綠旗兵數百名尚未敷用著阿木爾撒納酌留厄魯特兵一二百名於屯田處展放卡倫防守又前哨大隊兵俱進烏里雅蘇台不可無

人鎮守著留莫爾渾駐劄辦事此際辦理糧餉馬匹亦屬需人著舒赫德以章京銜協辦事務奏事一體列名著傳諭班第阿睦爾撒納等知之

丙申

命撤回副都統銜唐喀祿以副都統納穆扎爾管理阿睦爾撒納等游牧

軍機大臣等奏言唐喀祿據班珠爾等稱伊等人衆除已派出兵之人其現在游牧者俱係老

穉不能耕種恐夏秋難免饑餒代為陳奏查伊等自投誠以來荷蒙

天恩賞給牲畜以及口糧籽種俾其生計豐裕自應節儉度日永享樂利即或將來稍有匱乏儘可隨時酌辦不應目前即為瀆請唐喀祿理宜委曲曉諭令盡心耕種毋得藉端偷安乃竟據情冒瀆殊為不合應將所奏毋庸議唐喀祿交部察議奏入得

旨依議班珠爾等投誠以來朕已屢次施恩現在去  
夏秋尚遠果有必須接濟之處朕自加恩賞給如  
去歲策凌等人衆遇災生計稍窘朕即賞給口糧  
何必預為陳請前以唐喀祿尚能通曉蒙古語言  
是以賞給副都統銜俾照管阿睦爾撒納游牧乃  
一切未能盡心徒事瑣屑著即撤回仍在員外郎  
上行走納穆扎爾著管理阿睦爾撒納等游牧事  
務納穆扎爾所辦事務著舒明馳驛前往接辦



定邊左副將軍阿睦爾撒納等疏奏北路進兵  
事宜

阿睦爾撒納等奏言臣等奉到十二月二十九  
日

諭旨仰見

睿慮周詳準噶爾內亂情形俱在

聖明洞鑒今前隊已派兵六千名臣等於二月十五  
日以內即帶領前往屯田兵丁約一千名亦令

隨後起程但北路係往賊巢要路較西路更關緊要因於哈達哈等陸續送到馬匹內量其可用者挑出再派兵三千名令在臣等隊後接續起程共成一萬之數則軍威愈盛俟到額爾齊斯時度量情形如可與巴特瑪車凌等通信一面奏

聞一面即遣人宣揚

聖諭俾伊等帶兵前進臣等與西路將軍等於博羅

塔拉等處協力擒拏達瓦齊仰賴

天威遠播大功自可速奏奏入報

聞

丁酉

申飭定西將軍永常

上諭軍機大臣曰昨據方觀承奏永常催趲各隊兵

丁朕已降旨令仍按站行走凡經過各省不必照

永常行文辦理今據安泰奏稱接到永常催趲兵

丁之文議將所帶第三隊兵十站併為五站此皆  
永常悞會朕催令哨探兵前進之旨以致冒昧一  
併催趲自京起程兵丁抑思大隊之兵現有尚未  
起程者若朕前降旨非指哨探兵丁則大隊兵丁  
豈能於二月二十九日馳到軍營二十九日尚不  
能到又能向前更行趲進乎永常謬悞至此殊不  
可解著於兵丁經過各省速再行文知會令其仍  
按原站不必催趲永常著傳旨嚴行申飭

戊戌

命將軍班第等會議備禦哈薩克事宜

定邊左副將軍阿睦爾撒納等奏言察達克等  
遣莫寧察將噶勒雜特之庫綑送至軍營臣等  
詢問據庫綑告稱係噶勒雜特宰桑都噶爾屬  
下人都噶爾聞大兵收取扎哈沁集衆相商俱  
願歸順

天朝唯得木齊索和爾車凌等欲暫為觀望俟達瓦

齊果敗再為投誠今聞大兵收獲包沁想已紛  
紛逃避我向包沁而來途遇哈薩克錫喇所屬  
三人傳言哈薩克至伊犁將回衆所種穀麥搶  
去現在察罕烏蘇之伯勒齊爾居住達瓦齊住  
西巴爾圖地方曾遣伊宰桑恩克博羅特於哈  
薩克處捉生被哈薩克拏住哈薩克居住之巴  
朗向恩克博羅特云我係噶爾丹策零之弟爾  
等老多玉特喇嘛與我認識我遣人與爾同往

告知達瓦齊令其仍回舊游牧居住我在伊犁  
為台吉從此兩相和好不料達瓦齊暴虐異常  
竟殺巴朗來使奏入

上諭軍機大臣曰據阿睦爾撒納等詢問庫綑告稱  
哈薩克居住之巴朗自稱係噶爾丹策零之弟著  
班第詢問瑪木特伊係準噶爾舊人必能知之倘  
伊亦不知則巴朗並非噶爾丹策零之弟與準噶  
爾無涉矣又庫綑稱哈薩克兵入伊犁將回人穀

麥搶奪在察罕烏蘇之伯勒齊爾居住看來哈薩克兵現在伊犁就近地方如我兵前進遇哈薩克在彼當如何辦理著班第阿睦爾撒納會議速奏安插新降包沁人等

定邊左副將軍阿睦爾撒納等奏言察達克等收獲包沁人等戶口牲畜臣等詳查包沁之七得秦共六百五十九戶二千八百一十九口駝二百五十四隻馬二千九百八匹牛四千四百



二十七頭羊二萬五百三十八隻看來牲畜尚  
豐毋庸另給養贍其通瑪木特之戶口蒙

恩賞給盤費牲畜現在辦理其與包沁一併收獲之  
扎哈沁布庫努特葉克明安之台吉德濟特等  
屬下人及臣阿睦爾撒納屬下被擄之人并逃  
人巴朗之僕人共八十戶三百四十五口內將  
臣阿睦爾撒納屬下男婦十五口交努三等酌  
量辦理送至軍營令其完聚扎哈沁之九戶二

十五口并庫克新瑪木特屬下五戶二十七口  
布庫努特之五戶十九口俱交照管扎哈沁之  
侍衛台吉等暫行安置俟瑪木特回時編定旗  
分佐領將伊等一併編入葉克明安之台吉德  
濟特等屬下四十五戶一百八十五口暫交努  
三等於伊駐劄附近地方安插派員照管俟平  
定準噶爾後再行查辦都爾伯特之十二戶七  
十二口俟查明係何台吉屬下令其歸併居住

其巴朗僕人諾爾一戶三口拏送軍營詳審如  
實係隨巴朗逃亡即照沙拜等例解送京師發  
遣奏入

上諭軍機大臣曰阿睦爾撒納等辦理安插新降包  
沁人等甚屬妥協均著照所請行其巴朗僕人諾  
爾一戶訊明解京之處從前扎哈沁查出逃人沙  
拜等朕已施恩分賞伊等台吉想諾爾亦不過為  
巴朗逼勒隨行著將此三人訊明不必解京仍給

還策凌孟克此時策凌孟克尚在西路軍營令伊屬下宰桑等嚴行約束

命遷移阿睦爾撒納等游牧

上諭軍機大臣曰阿睦爾撒納以托忒字奏請遷伊游牧於烏里雅蘇台等處地方並將管理伊等游牧大臣更換一員又稱伊屬下人內有從前離散者懇賞給印文前往招降等語從前朕已降旨俟平定準噶爾後分封四衛喇特其輝特人等即在

其內毋庸另給印文在阿睦爾撒納之意以班第  
不允所行為此陳奏著傳諭班第俟準噶爾既定  
將輝特所有阿睦爾撒納原管之人即照所請令  
與伊等會合居住如有屬人衆多之頭目亦一體  
賞給封號管束其屬即策凌等之都爾伯特班珠  
爾等之和碩特亦均照此辦理至唐喀祿乃新用  
之人不諳事務朕已降旨撤回阿睦爾撒納等游  
牧移至烏里雅蘇台等處甚屬妥協即照所請行

班珠爾係與阿睦爾撒納同來之人亦應一併遷移其如何遷移之處著班第阿睦爾撒納會同納穆扎爾一面辦理一面奏聞阿睦爾撒納唯圖迅速成功早受朕恩勿以游牧為念新派之納穆扎爾曾照管都爾伯特游牧因彼處無事特將伊調管輝特和碩特部落至於該部落生計果有不足納穆扎爾即行奏聞朕自加恩撫卹即如策凌策凌烏巴什等來降後偶遇災疫稍為艱窘朕即加

恩撫綏伊等俱感戴朕恩搏節勤儉漁獵為生儘可樂業阿睦爾撒納可令宰桑等諄切曉諭其屬務令盡力耕種使永遠生計有資以副朕懷柔遠人至意並

諭定邊右副將軍薩喇爾曰阿睦爾撒納以托忒字奏請將伊游牧移居烏里雅蘇台等處朕以事屬可行已准其請惟奏請印文招降伊輝特台吉屬人一事是其欲取多人占據地方之意已經微露

似平定準噶爾全為伊一人集事矣薩喇爾到彼  
務須留心防範慎勿任其所行然亦不可稍為漏  
洩此時薩喇爾進兵愈速愈安若使阿睦爾撒納  
先進似覺稍為未便薩喇爾其善體朕意

己亥

諭尚書公哈達哈等揀選喀爾喀馬匹事宜

上諭軍機大臣曰前命哈達哈等往喀爾喀部內揀  
選馬匹備用查軍營現存馬六千匹已足為哨探



兵乘騎之用各處購買馬匹亦陸續送至自更充  
裕哈達哈等不必於喀爾喀部內挑馬過多如有  
臆壯驕馬量為揀選帶往軍營將彼處臆欠馬匹  
換交蒙古牧廠數月間即可肥壯則既於我兵有  
益而蒙古生計亦屬無損至兒馬騾馬則彼所賴  
以孳生不必挑取著傳諭哈達哈阿蘭泰阿思哈  
等遵旨妥協辦理

辛丑

定邊左副將軍阿睦爾撒納等疏奏詢明達瓦齊現在情形

阿睦爾撒納等奏言察達克等將收服包沁之顏達什洪郭爾瑚泰托克托瑪什等四人解送軍營臣等細加詢問據顏達什告稱我原在兩額爾齊斯之伯勒齊爾居住包沁人等投誠並未與我信息適至華額爾齊斯始知此信隨與我同住十八戶人口攜妻子牲畜前來投誠又

稱我於去秋前往伊犁見達瓦齊惟終日飲酒  
一切事務俱廢九月內達瓦齊遣伊舊宰桑薩  
爾坦帶兵往擒額林沁旋即敗回後傳聞哈薩  
克兵來達瓦齊又行文各處備兵兵皆未到及  
我回至托和木圖地方恰遇哈薩克兵將我擒  
去行走五日始行釋放由齋爾以至伊犁所有  
游牧俱被哈薩克搶奪並無戶口凡達瓦齊所  
屬皆言自伊為台吉以來竟無一日安寧是以

人人嗟怨至伊犁地畝雖稍有收成而馬匹皆甚平常臣等察看顏達什等聞風効順實出至誠理合照例安置隨飭剛什勒圖解送努三等安插奏入報

聞

壬寅

諭協辦陝甘總督劉統勲籌辦進兵運糧各事宜上諭軍機大臣曰劉統勲奏酌辦軍務摺內稱涼莊

寧夏蒲洲兵俱於二十四五日前可抵肅州其甘涼肅一提二鎮兵亦於三月初旬均可抵巴里坤軍營前隊哨探兵原定於二月二十九日自軍營起程嗣降旨令於二月中旬進發若三月初間始抵巴里坤已屬遲悞想奏摺時尚未接此旨接到自必遵照辦理著再傳諭劉統勲前隊哨探兵丁令其速行催調務於二月初十日全抵軍營其隨後續進官兵若可趨進亦酌量先行數起總以六

千名為率其餘仍按站行走不必嚴催致竭馬力  
至官兵進勦口糧原議俱令自行裹帶若進勦時  
於自行裹帶外又復官為馱運仍屬軍行糧隨故  
套從前岳鍾琪等辦理舊例與此次輕騎捷趨機  
宜殊未符合况北路進勦口糧俱自行裹帶而西  
路又官運三分之一辦理亦不盡一應速行籌畫  
以便捷輕利為主西北兩路亦不致參差其所奏  
大兵齊集軍營所需口糧酌量運往散給巴里坤

可以不留餘糧所見尚是巴里坤原可無庸另設  
倉庫存貯即有應需接濟亦可自哈密運往料不  
至於有悞應照所奏辦理

諭定邊右副將軍薩喇爾速行進兵

上諭軍機大臣曰昨覽阿睦爾撒納等疏奏顏達什  
所告準噶爾情形可見達瓦齊勢窮力竭我兵一  
到即可成功但哈薩克兵力稍強又與達瓦齊甚  
近若達瓦齊為哈薩克兵所擒或為阿睦爾撒納

及巴特瑪車凌拏獲均不如薩喇爾俘獲為善前  
已屢經降旨著再傳諭薩喇爾仍遵前諭不必拘  
定何處兵丁乘機速行前進西路之兵但能較北  
路先期到彼迅奏膚功方副朕委任之意仍將帶  
領兵丁若干及何日起程之處速行奏聞

癸卯

諭酌辦扎哈沁包沁貢賦事宜

上諭軍機大臣曰去年辦理烏梁海等貢賦已有章



程新降扎哈沁包沁人等想在準噶爾時亦有定  
賦除瑪木特及伊子弟朕已加恩寬免著傳諭班  
第等即查明扎哈沁包沁人等在準噶爾時如何  
交納貢賦亦照烏梁海之例寬免一年自明年起  
作何裁減交納之處酌辦具奏

甲辰

賜包沁宰桑阿克珠勒等官爵銀兩有差

上諭軍機大臣曰包沁宰桑阿克珠勒著授為三品

總管賞給孔雀翎并銀五十兩台拉克著授為四  
品翼領和濟木瑚里著授為佐領俱著賞給藍翎  
銀各三十兩再阿克珠勒等願往軍前効力著每  
人再賞銀五十兩并加恩寬免伊等納貢阿克珠  
勒等既願効力軍前著班第等於包沁人內挑選  
百名或五十名賞給整裝銀兩交阿睦爾撒納親  
身帶領前往軍營効力

二月乙巳

命侍郎兆惠協辦烏里雅蘇台軍營事務

上諭軍機大臣曰兆惠奏請同哨探兵前進與富德  
辦理臺站事務哨探兵進發隨營安臺既有將軍  
指麾又有富德查辦可以無庸兆惠前往烏里雅  
蘇台甚屬緊要莫爾琿一人尚恐不能周詳著兆  
惠即留烏里雅蘇台協辦事務在領隊大臣上行  
走

丙午

諭將軍班第等進兵事宜

上諭軍機大臣曰據阿睦爾撒納奏前隊兵六千名  
於二月十五日以前進勦屯田兵丁亦相繼前往  
末後再派兵三千接續策應辦理甚是阿睦爾撒  
納等隊後添派之三千兵即著班第帶往現在準  
噶爾情形窮蹙已極成功甚易朕意兩路哨探兵  
至博羅塔拉等處則與伊犁甚近彼處形勢即可  
瞭然著阿睦爾撒納薩喇爾詳察彼處情形若無

需續進大隊之兵可一面檄令撤回一面速行奏聞即駐劄伊犁之大臣等須留兵跟隨亦即於現在所領兵內挑留應用著傳諭兩路將軍等知之

丁未

諭西北兩路將軍等會合進剿

定邊左副將軍阿睦爾撒納等奏言臣等欽奉諭旨俾於二月十五日以前帶兵進剿不必候西路之兵查西路兵於二月二十八日自巴里坤起

程至博羅塔拉不過二十一二日北路兵於二月十五以前自烏里雅蘇台起程至博羅塔拉須四十六七日則西路兵先到十餘日北路不能馳赴不惟孤軍深入殊屬可虞且恐賊衆亦易於備禦臣等商議不若仍令西路兵聽候北路進發之後按期前往同至博羅塔拉會兵前進則軍威更為壯盛益可迅奏膚功奏入

上諭軍機大臣曰從前因恐達瓦齊為哈薩克兵所

獲或為巴特瑪車凌擒縛是以屢降諭旨令勿論  
何路之兵先至即行相機前進不必兩路會合今  
阿睦爾撒納奏到恐西路先到北路不能會齊不  
無孤軍深入之虞朕思用兵自宜計出萬全著將  
阿睦爾撒納原奏抄寄薩喇爾令其仍遵原定二  
月二十八日起程不必拘泥前旨俟到額林哈畢  
爾噶候北路信息再同至博羅塔拉會兵前進伊  
犁其如何通信會合之處速即奏報再阿睦爾撒

納此奏能合機宜與否伊若有所見亦即速行奏聞

庚戌

命陝西巡撫陳弘謀等撫卹沿途出痘兵丁

上諭軍機大臣曰陳弘謀奏索倫兵丁內現有患病及出痘之人從前派索倫兵丁原令該將軍將已經出痘者派往今在途又有出痘之人或係內地氣候使然否則兵丁等情愿前往不復慮及或冀



年長未必出痘耳此非他病可比即護送行走亦恐傳染究非所宜至因痘重而留於所在地方調治者若俟其痊愈時附入後隊前往度亦不能責其勞苦出力現在各路官兵尅期齊集固不需此數人也著傳諭陳弘謀及沿途督撫等如兵丁中有出痘者俱即留於各該處上緊調治俟其痊愈時資送來京交與兵部送回其現在業經護送前進者亦即一體留養毋令力疾行走如有因疾身

故者亦加恩料理遺骸令歸故土以副朕體恤士卒之至意

壬子

諭將軍班第等籌辦安插包沁人等事宜

上諭軍機大臣曰朕於阿克珠勒等入覲已授為總管等職又命瑪木特兼管包沁因彼係準噶爾舊人現授為內大臣命彼監收包沁人等貢賦轉行交納并管理一切事務非謂令伊管轄便係屬下

為伊納貢也前已諭知班第等令阿睦爾撒納奏  
稱將包沁之得木齊與扎哈沁之得木齊調遣安  
置之處雖百端開示不免疑懼看來包沁人風教  
各異若令別部人兼管或轉無益著班第等曉諭  
包沁人等伊等若願移往西路與吐魯番回子同  
住則既離北路即無庸瑪木特兼管今西路額敏  
和卓之回子亦移至吐魯番即著額敏和卓兼管  
亦可倘願居舊處則仍令瑪木特兼管阿睦爾撒

納既熟悉包沁人情可同班第詳細商酌妥辦

甲寅

諭厄魯特副都統職銜達什敦多卜帶兵先進事宜

定北將軍班第等奏言臣等接奉正月十八日

諭旨後厄魯特副都統職銜達什敦多卜亦至軍營

臣阿睦爾撒納細問達什敦多卜所言皆係伊

被獲以前情形至包沁投降後噶勒雜特游牧

情形若何及哈薩克錫喇都噶爾等現在何處

俱未深曉查臣等遵

旨挑選兵丁一千令達什敦多卜帶領先進現在所  
派厄魯特兵尚未到營若即令達什敦多卜起  
程徑至阿爾台離臣等大兵啟行之期尚遠彼  
此不能接應雖伊兄都噶爾在彼達什敦多卜  
一到自可降服但人心難測且住居都噶爾游  
牧之索和爾車凌係哈薩克錫喇之妻父適都  
噶爾等議欲來降伊尚攔阻達什敦多卜孤軍

深入後兵不至恐於事未必有益現在臣等所  
領哨探兵起程日期已近臣等公議令達什敦  
多卜會同圖倫楚察達克等往齊齊克淖爾守  
候於哨探兵起程前三日再令前往阿爾台  
務於大兵未進之前拏獲巴朗臣等隨即繼進  
以為應援斷不敢遲疑觀望貽誤軍機奏入

上諭軍機大臣曰班第等奏達什敦多卜等於哨探  
兵起程前三日前往甚屬妥協但達什敦多卜

起程太早則大兵不能接續未為盡善倘其相隔甚近則兩隊竟為一隊亦恐無益著達什敦多卜等必在阿睦爾撒納等前期三四日起程為善可即傳諭班第阿睦爾撒納等知之又

諭將軍班第曰朕前命達什敦多卜先往之旨原令阿睦爾撒納速即回奏乃阿睦爾撒納於二十二日接諭而二十三日奏事竟未言及至二十四日班第到軍營始行具奏或阿睦爾撒納不願達什

敦多卜前往故稍為徘徊俟班第到時方定主見  
抑或更有他故著班第密行具奏

定北將軍班第等疏奏新編烏梁海人等旗分  
佐領事宜

班第等奏言據青滾雜卜等文稱新收烏梁海  
人等應編旗分佐領隨查各總管屬下戶口多  
寡不齊若勻配分旗勢不免於離析是以將察  
達克屬下四十六戶編為一佐領作鑲黃旗其



在都塔齊處之恩克錫克等十八戶俟移來時  
即附入此佐領下赤倫屬下二百五戶編為三  
佐領作正黃旗車根屬下六十七戶編為一佐  
領作正白旗原係宰桑雅爾都屬下之一百三  
十五戶編為兩佐領即附入鑲黃旗從前散失  
人等如有陸續投來者各入本佐領下令其家  
室完聚嗣後如有帶領大眾來降之烏梁海宰  
桑各以次添設旗分編定佐領此次所編七佐

領下應補放佐領各一員得木齊各一員收楞額各一名俱著各該總管保送臣等驗看補放隨剴切曉諭爾等荷蒙

聖主洪恩賞賜官爵輕減差徭務各節儉謀生謹慎奉法毋得稍有怠玩奏入報

聞

諭將軍班第留心密察阿睦爾撒納


上諭軍機大臣曰阿睦爾撒納前奏請移伊游牧地

方朕已允行其請給印文招降輝特台吉一事不  
無欲取多人占據地方之意是以不准所請因思  
從前唐喀祿奏請班珠爾等有事定之後封阿睦  
爾撒納為汗之語似專封阿睦爾撒納一人統轄  
準噶爾地方者隨命班第留心辦理并將事定後  
封阿睦爾撒納為輝特汗其餘三姓亦封為汗之  
處時為宣露俾其妄念可除今乃更請印文會合  
伊從前分散屬下人等則其意更顯然阿睦爾撒

納本有併吞準噶爾之意今若令伊收合舊日人衆則我兵全為伊集事矣班第接旨後應於無意中道破令彼瞿然知悟從此斂跡則已倘或妄念日生則薩喇爾瑪木特等均非其匹敵班第或能制之但阿睦爾撒納已帶領哨探兵前往班第若不隨後進發則於事恐有未便朕昨命班第選兵三千帶領前往倘一時不能齊集則先選一二千兵亦必於阿睦爾撒納隊後即行前進倘阿睦爾

撒納稍露形迹班第係統領將軍即以便宜從事  
前此本欲諭知恐為阿睦爾撒納知覺此際彼已  
進兵故特密諭惟班第留心酌辦慎勿洩漏又奉  
上諭曰朕前諭班第令兩路兵至博羅塔拉相機深  
入不必彼此等候乃阿睦爾撒納但云於十二日  
帶兵起程並未奏及到博羅塔拉後或乘勢即進  
或候西路兵同進殊屬含糊兩路究竟必須會合  
與否著班第速即奏聞至北路之兵原定十五日

起程今已改於十二日較前已早三日則西路亦  
應於二十八日前數日方妥並著傳諭薩喇爾酌  
奪具奏



平定準噶爾方略正編卷六

欽定四庫全書

史部

平定準噶爾方略正編卷七十五

詳校官監察御史臣孫家賢

通政使司副使臣莫瞻菴覆勘

總校官進士臣

朱鈴

校對官編修臣

周厚轅

謄錄監生臣

汪灝



欽定四庫全書

平定準噶爾方略正編卷七

乾隆二十年春二月丙辰

上諭軍機大臣曰達瓦齊雖有罪之人究屬一部台  
吉大兵進征倘伊屬下見事勢窮蹙將伊獻出或  
被已特瑪車凌擒送阿睦爾撒納處毋加戕害一  
面解釋安慰密派強幹人員畱心看守一面奏聞  
候朕諭旨遵行至若哀布乃向助達瓦齊肆行暴

虐恣奸長惡之人倘見大兵進勦料難逋逃俘獻  
達瓦齊希冀僥倖則斷不可恕班第等一到軍營  
即縛袞布於達瓦齊前數其罪惡派人押解來京

丁巳

定北將軍班第等疏奏籌辦留兵屯田各事宜  
先是

上諭軍機大臣曰從前原議於四月內進兵且未深  
知達瓦齊情形故令於額爾齊斯派喀爾喀兵綠

旗兵并策凌所屬人等留駐屯田今進兵甚早而  
達瓦齊之力已窮兵到即可成功其額爾齊斯仍  
需屯田與否應另行酌辦如需屯田或即於策凌  
等游牧所留人內派往或凱旋後再將策凌等人  
衆派往著班第阿睦爾撒納詳議具奏此次進兵  
特為平定準噶爾將阿睦爾撒納等四衛喇特封  
為四汗俾所部咸登衽席若我兵奏凱後令阿睦  
爾撒納策凌等帶領多人前赴熱河朝覲至明歲

方回原處則往返徒勞且於伊等生計無益若派  
阿睦爾撒納策凌等親信宰桑約束兵丁各就其  
便留於原游牧居住伊等小台吉內有情願留彼  
者亦准於所獲達瓦齊馬匹牲畜內酌量賞給留  
駐彼處看守游牧則阿睦爾撒納策凌等明歲將  
伊等家口自喀爾喀地方帶往時諸凡妥協於生  
計大有裨益此朕為伊等生理籌畫亦著班第阿  
睦爾撒納商辦併諭薩喇爾知之此時達爾黨阿

如已到軍營亦照阿蘭泰著在哨探兵隊內前進  
烏爾登扎爾杭阿俱著在班第隊內前進但大兵  
前進後辦理新烏梁海等事務及照料糧餉看管  
游牧并一切接應俱屬緊要著嚴飭留駐烏里雅  
蘇台之大臣喀爾喀之大員等時刻留心稍有怠  
忽班第即指名參奏昨朕曾諭令兆惠往看巴特  
瑪車凌等今既進兵阿睦爾撒納即派伊親信宰  
桑再於軍營大臣內酌派一人先遣往巴特瑪車

凌處更為盡善兆惠仍辦理驛站糧餉游牧事務  
今令阿玉錫照管包沁人等特為包沁係新以軍  
威收服之衆故暫留伊於彼處照管俟事定後仍  
令阿玉錫駐扎哈沁地方所有包沁人內應放官  
員并存留得木齊收楞額等名目之處俟奏到日  
再降諭旨至是班第等奏言臣等接奉

諭旨公同商酌現在準噶爾窮蹙大兵一到自可迅  
奏膚功而平定準噶爾後額爾齊斯地方亦必

需駐劄兵丁照管新收人衆其派出屯田兵丁并牛種器械等物既俱備辦應仍照原議辦理至臣阿睦爾撒納策凌等俟大功告成後帶領彼處新降人衆瞻仰

天顏將所屬兵丁留於原游牧處居住另派賢能宰桑約束其小台吉內有願留者亦准留彼處酌量賞給資生之具俾其看守游牧使無往返之勞仰見

聖慮周詳無微不至臣等唯有感激涕零竭力奮勉  
以圖稍酬

高厚巴特瑪車凌現在何處尚無確信俟至噶勒雜  
特訪問得實差人前往侍郎兆惠現在軍營商  
辦臺站副都統富德前往查臺俟事竣同時臣  
等即會同將各臺安設妥協令兆惠速赴歸化  
城催辦運米事務達爾黨阿阿蘭泰到時俱遵  
旨令往哨探兵隊內其進兵後烏里雅蘇台應辦事



務交都統莫爾渾喀爾喀副將軍親王成袞扎  
布公旺親扎卜及舒赫德等在彼駐劄辦理至  
包沁人等俱係回子種類若令厄魯特駐彼照  
管鈐束較難故未令阿玉錫駐包沁地方仍令  
照管扎哈沁人等現在阿克珠勒等入

覲即便回營所有應編旗分佐領補放官員等事宜  
俟其到日查辦另奏奏入

上諭軍機大臣曰據班第等奏額爾齊斯仍須屯田

之處即著照所請行其耕種所得穀石以備接濟  
往來兵丁口糧亦屬有益若欲撫綏新收入衆於  
額爾齊斯駐兵則大功告成後伊犁已留重兵兼  
有大臣駐劄額爾齊斯去阿爾台甚近又何必更  
設兵駐防著傳諭班第等知之

定西將軍永常等覆奏催趲兵丁速赴軍營事  
宜

永常等奏言臣等接奉正月十一日

諭旨隨移咨甘肅督撫將應備兵丁駝馬糧餉速為  
妥辦其兵丁俱令於所定日期之前趕赴軍營  
二月初一日臣永常額林沁多爾濟已至肅州  
臣薩喇爾扎拉豐阿陸續俱到查察哈爾一千  
兵已經久駐哈密其厄魯特阿拉善各處兵丁  
俱係由口外前往想二月初十間俱可到巴里  
坤涼州蒲洲兵於正月二十二日自肅起程寧  
夏蒲洲兵於正月三十日自肅起程亦可按期

不至遲悞至現派滿洲蒙古哨探兵丁內如有  
不能到者臣等遵

旨於綠旗兵丁內撥補再自京來寧夏涼州等處教  
習厄魯特鎗法之健銳營護軍校良音泰等十  
八人俱情願前往臣等即帶至軍營以備驅遣  
臣等度量馬力極力趲行俟到巴里坤後將彼  
處辦理情形并薩喇爾等帶兵前進之處另行  
奏報奏入報

聞

密諭定北將軍班第

上諭軍機大臣曰現在阿睦爾撒納領哨探兵前進  
嗣後如有合奏事件批回後班第閱過即寄阿睦  
爾撒納閱看若班第獨奏或特降諭旨俱不必寄  
發可即密諭班第知之

命參贊大臣鄂容安採訪西陲輿地

上諭軍機大臣曰漢時西陲塞地極廣烏魯木齊及

回子諸部落皆曾屯戍有為內屬者唐初都護開  
府擴地及西北邊今遺址久湮著傳諭鄂容安此  
次進兵凡準噶爾所屬之地回子部落內伊所知  
有與漢唐史傳相合可援據者並漢唐所未至處  
一一詢之土人細為記載遇便奏聞以資採輯

協辦陝甘總督劉統勲奏報辦理馬駝情形

劉統勲奏言臣前因調來馬匹臚分不盡充足  
恐難供先進之用當將阿拉善兵五百名可否

歸入後隊俟與將軍督臣永常面商辦理先行具奏緣彼時所調之馬全未到肅誠恐馬力不足有悞先驅是以有兵衆不如馬強之議嗣將涼莊解到馬三千八百餘匹內分別挑驗莊浪之馬可用者居多涼州亦尚有可用之馬共足二千餘匹加以涼鎮營馬三千匹已足敷將軍大臣章京等自肅出口及官兵進發之用阿拉善官兵目下猶未到肅而所調之馬已經踵至

是阿拉善官兵到肅前赴軍營亦無馬匹不敷之處今將軍永常副將軍薩喇爾等於二月初一初二日先後抵肅遵奉

諭旨將原派寧夏涼莊察哈爾厄魯特阿拉善等兵及貝勒車木楚克扎布公丹拜公額林沁等兵并瓜州哈密回兵共六千一百餘名一併先進臣遵將此地現有馬匹儘數籌調并將哈密及軍營原調餘駝與裁減分例抽出之駝馱載軍



糧復議將後起官兵戰馬抽撥二千匹豫備更換其換存之馬即留軍營牧養於後起之西安滿洲兵出口時減給馬二千匹俟到軍營後將換存牧養之馬酌量添給現經該將軍等繕摺奏

聞臣隨即派委將弁解送軍營其餘一應駝馬口糧等項臣一面即飭解送馬駝將弁及派出運糧委員作速遵辦奏入報

聞

命寬免議處寧夏副都統和起等

上諭軍機大臣曰永常等參奏寧夏副都統和起侍衛海福於所帶兵丁惟領兵九百名前往留一百名在後尚未出口請將和起海福交部議處寧夏兵一千名原定於四月內前赴軍營後因歸於哨探兵隊內令和起催趨前進伊等隨將輜重留後派兵百名守護帶領兵九百名迅速前往尚屬奮

勉且已具奏在前非無故遲留者可比著從寬免其議處

密諭定北將軍班第查察阿睦爾撒納

上諭軍機大臣曰前阿睦爾撒納以托忒字奏請賞給勅書印信以便招集伊從前散失人等朕隨諭以平定準噶爾後將伊舊日所有人等即令與伊會合居住不必另給勅書印信不識阿睦爾撒納接到此旨情形若何議諭若何著班第即行奏聞

又據班珠爾納噶查告稱將阿睦爾撒納封汗帶領哈薩克人等瞻仰朕躬之處朕已降旨將四衛喇特台吉俱行封汗哈薩克事務俟平定準噶爾時令班第薩喇爾辦理具奏亦已諭知阿睦爾撒納矣此旨何以未經覆奏亦著詢問班第將阿睦爾撒納近日言動舉止密加查察據實陳奏

戊午

上諭軍機大臣曰班第帶領兵三千名起程之後其

續到兵丁著哈達哈酌帶一二千名速行前往與  
班第同進或略於班第之後緊相接應著傳諭哈  
達哈知之

已未

參贊大臣鄂容安奏報揀選綠旗兵前赴軍營  
事宜

鄂容安奏言二月初四日接奉

諭旨恐先進官兵一時不能到齊令臣於安西哈密

等處綠旗官兵內揀選豫備俟薩喇爾一到即  
行前進臣思北路先進官兵既於二月十五日  
內即行進發且巴特瑪車凌又率哈薩克兵往  
擒達瓦齊則西路先進之兵尤不可緩看此機  
會惟以迅速為要無須多兵隨即行文鄂昌豆  
斌令將安西所派兵內現在本城之三百名即  
日料理起程務於二月十五日內至巴里坤軍  
營臣星夜前赴哈密將彼處兵內揀選七八百

名或千餘名計涼莊官兵一千察哈爾官兵一  
千合之現添綠旗兵丁已有三千餘名即寧夏  
官兵厄魯特兵不能趕到亦儘足應用其所需  
馬駝口糧等項臣到哈密即行通融妥辦務令  
齊備並即率領先赴巴里坤今聞薩喇爾等二  
月初一日已到肅州一抵軍營即可前進無悞  
奏入報

聞

庚申

協辦陝甘總督劉統勲奏報甘涼等處官兵到  
肅起程日期

劉統勲奏言本月初八日延綏鎮總兵傅魁來  
至肅州現在甘涼官兵即日過肅臣即令該總  
兵就便帶領甘涼官兵出口沿途管束彈壓又  
貝勒羅卜藏多爾濟亦於本月初五日帶領阿  
拉善官兵來至肅州臣照例辦給馬駝口糧鹽



菜等項催令前赴軍營諸處官兵所帶駝馬有  
餘兼程前進尚可與哨探官兵一同進發奏入  
報

聞

定北將軍班第等奏報編定扎哈沁旗分佐領  
事宜

班第等奏言扎哈沁人等編次旗分佐領補放  
官職各事宜原議俟瑪木特回時辦理今臣阿

睦爾撒納色布騰巴爾珠爾帶領哨探兵於二月十二日起程臣班第亦帶領次隊兵隨後進發不及候瑪木特到時公同辦理是以臣等公議即遣人會同翼領阿玉錫令先辦編次旗分佐領之事其應補放佐領得木齊等官及所留收楞額等人俟瑪木特回時公同揀選再與臣等驗看補放奏入報

聞

定北將軍班第等疏奏辦理分給馬匹事宜  
班第等奏言臣班第在京與軍機大臣會奏現  
在軍營及各處購買馬匹可得十一萬有餘除  
應付哨探兵及續進大兵需馬七萬有奇尚餘  
四萬匹參贊大臣哈達哈等往喀爾喀處揀選  
馬匹料亦可得數千俟到軍營後徹底清查悉  
心籌辦今查明已到未到馬匹內除賞給阿睦  
爾撒納等并前次進兵乘騎及厄魯特等騎去

未交馬匹外實存馬三萬六千餘匹又陸續收到馬三千餘匹共三萬九千餘匹除揀選二萬六百餘匹解送卡倫以備六千哨探兵乘騎外所餘馬一萬八千餘匹或因前次進兵未經休息或適從遠處解來俱欠臄分俟草長牧肥方可適用其各處未到馬匹共六萬有餘除舒赫德親往翁金達什和碩地方查辦外餘皆節次差催飭令陸續趕到以備大兵前進又哈達哈

於喀爾喀各旗選得馬一萬七百餘匹陸續即到一并揀選堪用者解送卡倫備用復查哨探兵於二月十二日起程後大營聲援兵及屯田等兵亦應陸續前進今察哈爾副都統銜栢起帶兵二千名於二月中旬可抵烏里雅蘇台而昭烏達兵二千名亦將次到營俟此兩次兵到時將馬匹口糧妥辦臣班第帶領前進此後續到兵丁辦令起程之處令都統莫爾渾親王成

袁扎布監辦俟大兵盡行起程後再將成袁扎布遣往屯田地方辦理事務奏入報

聞

準噶爾噶勒雜特部人齊倫來降

命賞給安插如例

諭西北兩路將軍會兵前進事宜

上諭軍機大臣曰據班第等奏稱來降之噶勒雜特部人齊倫告稱噶勒雜特之宰桑哈薩克錫喇都

噶爾等俱向伊犁遷去阿睦爾撒納之兄巴特瑪  
車凌等皆已敗出阿睦爾撒納謂其言荒唐無據  
噶勒雜特人等聞我兵收服包沁雖遷移他去我  
兵撤回伊等自仍歸原游牧居住且此際牲畜疲  
瘦又安能遂至伊犁所見甚是但既有此言則達  
什敦多卜等為前哨兵必須有兵接應方合機宜  
著傳諭西路將軍副將軍等仍照阿睦爾撒納等  
所奏兩路大兵至博羅塔拉會合前進勿拘泥從

前所降之旨再都噶爾原有投順之意今達什敦  
多卜等又前往擒拏巴朗想都噶爾必聞我兵進  
發前來投誠巴特瑪車凌即真敗出諒亦不遠聞  
阿睦爾撒納領兵前進亦必來尋伊弟阿睦爾撒  
納惟相度事機小心辦理為妥再巴朗背恩逃竄  
反捏浮言阻撓歸順之人甚屬可惡伊現在居近  
北路或聞大兵將至逃往西路亦未可定薩喇爾  
務遵前旨訪得巴朗信息即另派兵先行前往擒



拏巴朗解送京師正法勿令遠颺又

諭曰北路哨探兵起程後班第隨領兵數千尾之而  
進西路薩喇爾領哨探兵起程後永常亦當領兵  
繼進索倫巴爾虎兵前往西路約計二三千名永  
常可即帶領前往與哨探兵相為接應其大兵再  
為陸續前進至前後如何通信俾呼應相通與薩  
喇爾等商議妥辦將此傳諭知之

壬戌

諭定北將軍班第等

上諭軍機大臣曰據班第等奏大兵五月內可到伊犁到彼之後事勢既定令阿睦爾撒納會同將軍大臣等將續行應辦事宜商辦妥協再帶領準噶爾各台吉前赴熱河入覲大約九月初旬可到阿睦爾撒納深知彼處情勢至伊犁時一切與班第會同定議自應妥協至衆台吉前來入覲策凌策凌烏巴什訥默庫班珠爾等俱係參贊大臣彼處

無應留辦理之事儘可帶領前來著傳諭班第阿  
睦爾撒納俟到伊犁後其台吉頭目即著策凌等  
帶領入覲阿睦爾撒納在彼處暫住將一切規模  
辦定再行輕騎前來如此則辦理彼處事務及帶  
領入覲之人可無兩無貽悞又

諭曰覽班第等所奏軍營情事阿睦爾撒納不無欲  
獨成大功之意彼為將軍議事時自應向前但薩  
喇爾瑪木特亦皆將軍參贊大臣凡事宜會同商

辦則將來大功告成不得謂為伊一人之力彼雖  
欲專擅亦不能矣著傳諭班第留心辦理切勿令  
彼先行獨辦然後告之班第轉奏也再帶領入覲  
之台吉人等若至九月未免太遲但過於催促又  
恐阿睦爾撒納生疑朕意將應入覲之台吉人等  
派策凌等帶領先來阿睦爾撒納暫留彼處酌定  
規模亦不必久駐不過月餘即可兼程前來朕已  
另降諭旨至彼處一切應辦事務俟阿睦爾撒納

起程後班第可仍遵前旨與薩喇爾瑪木特等商  
議妥辦此朕密諭班第之旨著班第悉心體會慎  
勿洩漏

癸亥

定北將軍班第等疏稱辦理派撥兵丁起程事  
宜

班第等奏言本月十二日哨探兵起程起隨令  
屯田兵起程并聲援兵亦應接續前進從前所

派喀爾喀四部落之聲援兵節次咨催尚未全  
到除將已到者辦令起程其未到者即於現在  
此處之喀爾喀兵內頂補先派二千令其隨屯  
田兵前去留兵一千在布拉罕地方駐劄其一  
千在哈達青吉爾布拉罕青吉爾等處駐劄作  
為哨探兵後聲援照管臺站豫備接應再於續  
到兵內派一千名前往亦在青吉爾等處駐劄  
查聲援兵內除派出屯田兵七百名外看守烏

里雅蘇台倉庫應存兵二百豫備烏里雅蘇台  
大臣差遣應存兵二百看守塔米爾倉庫應存  
兵一百照管三項厄魯特游牧應各存兵一百  
大兵進後喀喇阿濟爾罕等處既不用兵駐防  
俱撤令各回游牧唯奇爾吉斯淖爾之扎拉圖  
地方所駐兵三百名原為堵禦新烏梁海等之  
出路未便全撤應酌減一百令扎薩克台吉齊  
巴克扎卜帶領照舊駐防所餘兵一百名令其

照管屯田等處至管轄屯田兵有原派塔爾瑪  
善現在齊齊克淖爾居住屯田兵由彼經過即  
令前往額爾齊斯等處詢問可以屯田處即行  
耕種俟親王成袞扎布將後隊事務辦畢即往  
額爾齊斯公同商辦派出管轄聲援兵之郡王  
巴扎爾什第公達爾扎巴圖孟克齊旺多爾濟  
尚未到營兵丁起程之時暫令協理台吉管旗  
章京等帶領前往如途間遇本隊大臣即令交



明管轄奏入報

聞

甲子

定北將軍班第奏派侍衛奇撤布等照管包沁游牧

班第等奏言新降包沁人等安插齊拉罕地方原令齊齊克淖爾之軍營大臣帶管今大兵前進撤回齊齊克淖爾之兵包沁人等不可無人

彈壓臣等商之瑪木特擬派三等待衛奇徹布  
同協理台吉達瑪林前往照管包沁游牧併將  
瑪木特派出之扎哈沁得木齊阿巴策凌等令  
其相助奏入

上從之

命收服歸降人等不必遷移內地

上諭軍機大臣曰現今達什敦多卜前往阿睦爾撒  
納亦領兵前進噶勒雜特人等諒必歸順但伊等

投誠後必將其游牧內移則新附者未免過勞而我軍亦多一番部署著傳諭班第等於噶勒雜特人等投順後擇其宰桑頭目應帶至軍前者即行帶往餘皆不必遷移內地仍令於原游牧處居住將來歸順之人俱著照此辦理

定北將軍班第等疏奏仍令瑪木特在哨探兵內前進

班第等奏言臣等前奉

諭旨瑪木特恐於進兵之前不及前赴軍營即不必  
令在哨探兵內行走今瑪木特已於二月初七  
日趕赴軍營應仍令其帶兵前進協辦軍務奏  
入報

聞

乙丑

命議處遲悞馬駝之喀爾喀副將軍公格勒克巴木  
丕勒

定北將軍班第等奏言上年八月奏交喀爾喀副將軍公格勒克巴木丕勒購買馬駝屢催未到僅以空文含糊咨覆查格勒克巴木丕勒係効力贖罪之人理應倍加奮勉乃以馬駝重務於去秋交銀購買至今尚未解送殊屬不合應請

旨交部嚴加議處奏入得

旨該部嚴加議處具奏

諭定邊右副將軍薩喇爾等辦理進兵事宜

上諭軍機大臣曰鄂容安奏策凌策凌烏巴什等兵於十一二日可至軍營策凌孟克等兵內有一半步行十五日前後尚恐未必能至朕先令哨探兵於十五日前起程嗣又令照原定二十八日之期今看此情形即二十八日亦未能趕到著傳諭薩喇爾等若已經趕到即日帶領起程倘或不能則不必守候伊等即帶領別項兵丁先進交與賢能

之員俟其到後撥給馬駝等項隨後再進如此項  
兵丁為數無幾又非緊要得力之人則可不必帶  
領前往即將伊等安設臺站以備驅策再現在侍  
衛拜唐阿甚多若於四五臺之間將侍衛拜唐阿  
安設一員約束稽查往來驅遞甚為有益薩喇爾  
等即遵旨辦理

諭定西將軍永常等酌辦官兵分起前進事宜

上諭軍機大臣曰劉統勲奏先進各兵候齊集進發

尚須時日不能不於裹帶之外另給口糧以資兵食先進兵丁若俟齊集後一併進發則恐行走壅滯不若以兵到四起約滿二千名即令帶領前進如此則聲勢聯絡後先可以接應亦合用兵機宜著傳諭永常劉統勳等所有各路應行先進之兵到營約滿二千即照此辦理嗣後陸續到營即陸續進發均以二千為率巴里坤軍營無須另辦口糧再西路續進之兵原撥一萬六千名倘前隊已



足敷用可以迅速成功不須復行多進即將最後  
兵丁酌量停止不必拘定前數可併諭薩喇爾等  
知之

參贊大臣鄂容安疏奏籌辦官兵及裹帶口糧  
事宜

鄂容安奏言臣於初六日到哈密詢知厄魯特  
兵於十一二日可到哈密相近地方則先進兵  
內即寧夏官兵不能趕到已有四千之數再運

到哈密口糧先進官兵已足敷用惟運糧駝隻  
及應給厄魯特之馬駝因先進之期甫經更改  
尚未趕到事關軍務機不可失未便拘泥貽悞  
查原議先進官兵口糧自行裹帶四十日官為  
馱載八十日今馱隻既未到齊口糧又關緊要  
臣酌量自行裹帶六十日已有兩月之糧審度  
事機諒可成功且沿途凡有平定地方均可接  
濟其餘六十日口糧已行文嚴催至先進兵丁

所需馬駝口糧火藥鉛彈等項臣俱不拘原議  
無論何項通融趕辦總於二三日內齊備臣即  
自哈密進發二月望前可抵巴里坤俟薩喇爾  
一到再公同商酌妥辦又厄魯特之兵需用茶  
餉軍行之後無處購覓亦於哈密現在舊茶內  
酌撥一千封搭運備用奏入報

聞

丙寅

定北將軍班第等疏奏辦理扎哈沁等納貢派  
兵事宜

班第等奏言臣等屢奉

諭旨隨查扎哈沁包沁人等在準噶爾時因係駐防  
邊境每年冬季進獻獸肉間隔一兩年協助養  
贍喇嘛之牲畜一次如有出兵及差往西藏諸  
事即派令資助臣等愚見既蒙

聖恩豁免伊等今歲貢賦自明年始令交納應俟大

兵凱旋後再行定議妥辦總管阿克珠勒等既  
情願効力軍前俟其到軍營日照例辦給馬匹  
盤費等項令其趕赴臣阿睦爾撒納等帶兵過  
齊拉罕時酌量於包沁人內揀選二三十名賞  
給整裝銀兩帶往軍營奏入報

聞

平定準噶爾方略正編卷七

欽定四庫全書

平定準噶爾方略正編卷八

乾隆二十年春二月丙寅

命定北將軍班第等嚴審叅贊大臣努三烏爾登等  
推諉隱匿之罪

先是有

旨以努三烏爾登領兵收服扎哈沁後未即擒拏逃  
犯巴朗諸事退諉交班第阿睦爾撒納審訊並

命策楞兆惠查明努三等收取牲畜等項有無隱匿  
一併具奏至是班第等審訊具奏

上諭曰據班第等訊問努三烏爾登等供詞一切推  
諉俱卸過於薩喇爾一人夫薩喇爾歸順未久從  
前收獲烏梁海人衆時即有搶擄之事以伊舊染  
準夷習俗初到未知法度是以姑為寬容若努三  
烏爾登乃滿洲世僕亦效準夷之所為是尚可寬  
宥乎且烏爾登收服烏梁海時未將逃人巴爾報



出努三擒獲包沁逃人特赫拜哈都理應正法乃並未奏聞請旨俱屬舛謬策楞所查努三之事尚未奏到著傳諭班第阿睦爾撒納即將努三烏爾登併案嚴審定擬具奏若班第等已經進兵即交駐劄烏里雅蘇台大臣訊問仍報將軍等定罪奏聞再烏爾登將現有馬匹牲畜什物開單呈報伊至軍營已三四年何能將歷年所有一一登記顯係豫得消息將馬匹牲畜隱匿各處少開數目希

圖卸罪或兆惠未行詳查亦未可定班第等務徹  
底嚴查毋得任其狡飾

丁卯

諭定北將軍班第密奏班珠爾等情形

上諭軍機大臣曰朕前以納噶查誤記朕旨有事成  
後移居青海之語令傳諭班第等明白曉諭班珠  
爾納噶查想班珠爾等此時已至軍營伊等一聞  
曉諭情形若何并有何言語之處著班第密奏毋

泄

諭安設軍營臺站事宜

上諭軍機大臣曰據劉統勲等奏口外文報臺站從前軍營舊路由橋灣直抵巴里坤路徑久廢並無人煙請仍由安西哈密一路安至軍營口外馳送軍營文報安設臺站惟在路徑直捷方免遲滯何必定有人煙之地若由安西哈密一路必致紆遠此蓋綠旗將弁安常習故憚於遷移而不顧軍務

奏報之遲悞也現在軍營臺站自當仍照舊路由  
橋灣一路安設其哈密安西軍臺亦不必盡撤著  
酌留十之三四以備偶有哈密安西各處文報往  
來之用

議定沿邊驛站添設馬匹事宜

協辦陝甘總督劉統勲奏言陝甘安設臺站備  
給官兵係在南路其沿邊一帶為甘省北路臣  
因兵行南路大臣官員亦必俱從南路而行未

將沿邊各站設法籌辦每站止設馬自四匹至  
三四十匹不等差務絡繹實屬不敷供應現在  
軍務未竣正資往來且大兵指日凱旋北路赴  
京既近將來大臣官兵等自必仍由北路行走  
請將沿邊各驛俱照寧夏在城驛之例一律設  
馬六十匹俟南路各臺驛馬兵過捲撤時即酌  
調分安北路軍務告竣仍裁歸原額奏入得

旨軍機大臣議奏尋議查官兵經過甘省南路安設

臺站尖宿俱有定程按站預備至奉差之大臣  
官員等自應就近從沿邊一帶驛路行走原非  
俱由南路前往沿邊各驛額設馬匹不敷自當  
急為籌備應如所請照寧夏在城驛之例一律  
設馬六十四匹俟南路各臺兵過捲撤時即行酌  
調安設仍於軍務告竣後裁歸原額但南路各  
站馬匹既俟兵過捲撤分安北路則大兵凱旋  
所需站馬亦須另行調撥是否不致此盈彼絀

應仍交該署督隨時籌畫俾軍臺驛站兩無貽  
悞方為妥協奏入

上從之

命議處遊擊高志武等

協辦陝甘總督劉統勲奏言甘州提標應解出  
口馬駝經提臣王進泰派委遊擊高志武管押  
原派將弁并兵丁一千三百餘名出口近聞該  
處解送駝馬兵丁有回至肅州者隨經查明遊

擊高志武行至長流水地方止帶兵七百餘名  
前行留兵六百六十一名令其在彼等候至二  
月初三日未見信息口糧將斷俱行回至肅州  
查選派兵丁原為牽送馬駝豈容中途留頓任  
意回營應請將高志武交部嚴加議處又甘肅  
道公泰等稟稱查驗涼莊解到戰馬三千七百  
餘匹內可用者二千六百餘匹嗣因寧夏滿兵  
騎來馬匹廐好者居多酌量更換擇其疲乏者



一千九百餘匹將涼莊馬匹換給其換下之馬  
遵照原奏交肅州鎮標以補營馬摘缺之數旋  
聞涼莊解馬兵目有與寧夏滿兵私自騰挪之  
弊緣該處馬匹平常不能盡數交納見寧夏滿  
兵騎來馬匹臆壯遂將解來疲弱之馬換給寧  
夏交官私借寧夏好馬呈驗仍換給寧夏滿兵  
騎往公泰等親赴馬棚查出弊竇解馬協領明  
德等毫無覺察實屬疎縱奏入得

旨該部分別議處具奏

己巳

定邊左副將軍阿睦爾撒納疏奏預籌擒獲達  
瓦齊事宜

阿睦爾撒納奏言臣接奉

諭旨令籌辦擒獲達瓦齊事宜查陸續投降人等俱  
言準噶爾情形窮蹙已極誠如

聖鑒巴特瑪車凌係臣近族若伊能擒獲達瓦齊自必

俘獻

聖朝冀受

殊恩倘達瓦齊為哈薩克巴朗所擒不特巴特瑪車  
凌不肯俯首屈服且巴朗並非噶爾丹策零之  
弟亦斷不能撫有準噶爾人衆臣意無論何人  
但來歸誠俱廣布

天恩准其投順如或抗違即當領兵進剿雖巴特瑪  
車凌臣亦不敢以私情稍為寬恕現在兵已起

程侯到噶勒雜特等處自當採取信息相機而行奏入報

聞

命移郡王訥默庫等游牧

上諭軍機大臣曰據班第奏郡王訥默庫貝勒剛多爾濟等告稱現在所居塔楚地方喀爾喀厄魯特人等出痘伊等屬下疾病者多請將游牧移至拜達里克之北自扎卜堪河源博羅喀卜齊爾至鄂

爾海西拉烏蘇等處俟大功成後仍移歸舊游牧  
亦甚近便訥默庫等現在軍前効力其游牧既有  
病人即著移往於所請之處班第可曉諭伊等惟  
努力成功勿以游牧為念再從前訥默庫等游牧  
與親王策凌等游牧相近故交舒明就近照管今  
所移游牧既與阿睦爾撒納游牧相近其訥默庫  
剛多爾濟屬下都爾伯特人等即著那木扎爾兼  
管

申諭定北將軍班第密奏班珠爾等情形

上諭軍機大臣曰班第所奏曉諭班珠爾納噶查等  
一摺觀納噶查所告尚屬含糊前伊奏居青海時  
朕原諭以事定後或居原處或居青海悉從其便  
並未令其必居青海也今稱將伊等屬下由巴里  
坤遷移安插亦與原旨未符其安插伊等於青海  
之語納噶查曾否告知唐喀祿亦未聲明再諭以  
將班珠爾封為和碩特汗及伊等或居青海悉聽

其便之旨伊等意見如何究係願居青海或仍願居準噶爾地方著傳諭班第據實密奏

壬申

諭定邊右副將軍薩喇爾等

上諭軍機大臣曰據薩喇爾等詢問蘇珠克圖告稱哈薩克巴朗並非噶爾丹策零之弟朕前曾降旨詢問阿睦爾撒納據奏在哈薩克時留心察訪知係冒稱巴朗名色不足為據合之薩喇爾所奏其

為假冒無疑再降人齊倫曾言哈薩克兵現為達  
瓦齊擊敗使哈薩克力量稍強能擒達瓦齊則進  
兵時須豫籌所以備禦之道今並未占據伊犁早  
已敗退我兵進剿尤為便捷況兩路哨探兵會合  
一處已逾萬數乘機前進儘可迅奏膚功薩喇爾  
務加意奮勉仰副朕懷至擒獲達瓦齊後應如何  
辦理哈薩克事務會同班第阿睦爾撒納等詳籌  
妥辦



諭協辦陝甘總督劉統勲等查叅沿途遲悞驛站官員

上諭軍機大臣曰薩喇爾扎拉豐阿奏前赴軍營沿途驛站馬匹缺少遲悞之處著傳諭劉統勲陳弘謀恒文等將各該處地方官查明叅處

癸酉

定北將軍班第密奏遵

旨曉諭班珠爾等

班第奏言臣接奉

密諭令臣曉諭班珠爾納噶查緣由仰見我

皇上先幾坐照杜漸防微之至意臣觀納噶查狡而

好事且自恃才能外雖承順阿睦爾撒納而心

實藐視即伊兄班珠爾人甚朴拙亦為其所輕

適奉

旨以伊誤記前次面奉

諭旨甚覺惶恐即將伊告知唐喀祿之言不行承認

臣隨加訓飭嗣後諸事留心不令其任意乖張  
並將平定準噶爾後分封四衛喇特為汗各管  
其屬之處明白曉諭班珠爾等又與阿睦爾撒  
納等聚會時亦不時提及使之熟聞阿睦爾撒  
納人尚明白一經開導即知悔悟無之額駙色  
布騰巴爾珠爾深知其性每於言論之時化其  
私心俾其無所希冀臣等唯同心協力黽勉成  
功其善後事宜臣與鄂容安留心商辦俟阿睦

爾撒納帶領哈薩克人衆入

覲後臣等即同薩喇爾酌定具奏斷不許其稍有欺罔擅專事權再哈薩克游牧舊在伊犁西北後漸移至東北者甚多現在額爾齊斯之北亦有與阿睦爾撒納游牧接壤之處奏入報

聞

諭定北將軍班第等豫籌大功告成善後事宜

上諭軍機大臣曰據投降人等均稱哈薩克兵及巴

特瑪車凌等為達瓦齊所敗雖其虛實未定然亦  
須豫為籌畫庶臨時不致周章著傳諭班第阿睦  
爾撒納於大功告成後若哈薩克人等投誠前來  
將伊大頭目酌量赴京入覲賞給官爵其所屬之  
人仍於原游牧處安插不必遷移倘竟不歸誠亦  
不必用兵攻取其如何設立防範或應乘機辦理  
之處阿睦爾撒納既深知其情勢可與班第定議  
辦理巴特瑪車凌係阿睦爾撒納之兄今既敗走

倘聞大兵一到即來投順朕必為之加恩即或伊不能來亦當遣人迎取豈有伊弟受朕重恩而令其兄遠棄於哈薩克之理乎此皆成功以後事宜但既至伊犁則相隔尤遠倘臨期再為奏辦未免稽遲是以先行曉諭惟在班第等相機集事

三月甲戌朔

上諭軍機大臣曰班第奏新獲烏梁海博爾貝告稱達瓦齊現派兵四千會同哈薩克兵三千向阿爾

台前來烏梁海宰桑布珠庫亦同領兵前進並有  
令察達克赤倫車根等探信之語其意欲令致疑  
察達克等不為我兵遣用博爾貝所告全屬虛妄  
此係必無之事布珠庫乃達瓦齊信任之人故作  
說言虛張聲勢冀少緩我大兵前進之意且不論  
其言之虛偽即使果實亦於我兵前進全無關礙  
達瓦齊誠帶兵前來正值阿睦爾撒納等鼓勇深  
入成功愈可迅速阿睦爾撒納深知彼處情形博

爾貝所告之語其真偽自必了然但布珠庫既為  
達瓦齊出力則遣往之赤倫或被伊戕害亦屬可  
慮赤倫感激朕恩輸誠効力其意深屬可嘉如果  
有受困之事阿睦爾撒納就近即派兵救援現在  
察達克亦在彼處或即派察達克前往亦可阿睦  
爾撒納一面酌量辦理一面仍帶大兵前進斷勿  
少為疑惑博爾貝係車根屬下人而聽布珠庫之  
指使妄言惑衆復致傷我兵丁情甚可惡著阿睦



爾撒納詳細詢問即於軍前正法又

諭曰阿睦爾撒納詢問博爾貝奏稱布珠庫之言或恐我兵威所至不准投順或係達瓦齊恐各處烏梁海悉行歸降設計安慰均未可定現在扎拉圖所駐之兵毋庸撤回杭吉爾察克地方應添兵駐防已移咨班第辦理並令察達克前來面同博爾貝質對其言之真偽使投順之烏梁海等勿致生疑俟質對後即將博爾貝正法以彰國憲阿睦爾

撤納辦理甚合機宜與朕昨所降旨脗合即著照  
此辦理此必布珠庫捏造謊言冀緩我軍並使我  
致疑於初降之烏梁海等不復遣用耳阿睦爾撒  
納令察達克前來面同博爾貝質問明白不特衆  
烏梁海俱可安心察達克亦全無疑懼自當愈感  
任用之恩出力報効朕意博爾貝所言哈薩克三  
千兵會同達瓦齊兵四千前來之語哈薩克之兵  
或即從前降人庫綑所稱哈薩克巴朗及巴特瑪

車凌所領之兵耳果爾則巴特瑪車凌乃阿睦爾  
撒納之兄豈有反與達瓦齊會合之理其言全不  
足據於我兵亦毫無關礙招摩多等處駐兵防守  
亦可即不駐兵亦無不可此時惟赤倫前往事稍  
可慮如果須應援阿睦爾撒納即遵朕前旨留心  
辦理否則俟大兵平定伊犁後此等烏梁海自必  
歸降此時原不必分兵前往也現已令察達克前  
來俟其到時即可詢知赤倫現在情形察達克如

恐赤倫在彼或中布珠庫詭計伊欲帶兵策應即  
照伊所請給兵前往如不需策應亦即停止

臣等謹案軍前間諜之言最足動搖觀聽如  
博爾貝妄稱達瓦齊會同哈薩克領兵前來  
之語其意蓋欲離間新降之烏梁海察達克  
等不復遣用耳於此稍涉顧慮何以祛衆惑  
而靖人心哉

皇上坐照如神灼然斷其必無是事

申諭將軍等鼓勇深入設令達瓦齊尚有兵力中途

一遇

天兵勢同摧枯拉朽尤

聖漠所洞燭靡遺者至察達克等甫經輸誠自効之  
人不因影響流言遂加隄備並令將軍等質  
對明白俾一時疑慮全消即一無知之烏梁  
海猶不憚推心置腹委曲成全又以宵小鼓  
煽為奸且

念及遣往之赤倫或被戕害則凡為國宣力之人誰  
不感激奮勉益仰見我

皇上之策勵我行無遠弗周無微弗至也

命定北將軍班第籌辦運帶軍糧事宜

上諭軍機大臣曰班第奏帶領察哈爾兵丁於二月  
二十日起程續進令永貴將後隊官兵口糧辦理  
支給外所有餘剩駝隻酌量攜帶糧餉跟隨大兵  
相繼前進俟辦定再為奏聞此奏殊未明晰現在

大兵鼓勇直入成功指日可期官兵已攜帶口糧  
四個月又何須額外帶往預備此或係預備賞賚  
之用或從前議帶兩月口糧後復定為四個月而  
於官兵起程時未及滿支四個月之數今特為之  
補運均未聲明如係帶往預備賞賚之用尚屬可  
行若官兵已攜帶四個月口糧今復多行裹帶接  
續前進萬餘兵丁應備口糧若干需用駝隻若干  
中途保護既分兵丁之力且防意外之虞殊未妥

協著傳諭班第查明如係必需之項一面計數奏聞一面辦理尋班第奏言現在前隊哨探兵六千名俱攜帶四個月口糧臣帶領察哈爾兵二千名亦攜帶三個月口糧並無減半留存須俟續運者特備賞之項從前未經攜帶現計衆兵進發後馬駝尚有餘剩臣意酌帶軍餉不特大兵有需用之處可以接濟而平定準噶爾後一切賞項亦可動支且此次解餉兵丁即接續大兵



前進照看亦易似可無意外之虞惟現在所餘  
馬駝尚難定數應交與駐劄烏里雅蘇台大臣  
等量臣等前進之兵成功遲速及所餘馬駝實  
在數目再行詳悉籌辦奏入報

聞

乙亥

密諭定北將軍班第

上諭軍機大臣曰班第陳奏阿睦爾撒納情形一摺

有不時留心防範之語前因納噶查有承順阿睦爾撒納之意是以降旨令班第善為曉諭俾其妄念不生今看阿睦爾撒納一應事宜尚屬奮往亦不宜稍存形跡致令疑懼著傳諭班第嗣後向阿睦爾撒納勿遽露防範之意並將朕節次所降密旨即行封固繳回

丙子

定西將軍永常等奏報領兵起程日期

永常等奏言臣等於二月十九日至巴里坤查  
驗各處兵丁俱已到齊惟原派和托輝特公額  
林沁兵二百名丹拜兵一百名尚在未到俟到  
時即行帶領前往否則即於鄂容安帶來哈密  
安西肅州兵內揀選共足六千名之數擬遵原  
奉

諭旨於二月二十八日起程今聞有葉克明安巴雅  
爾一人帶領一千戶口移至額林哈畢爾噶地

方前來投順俟到彼處辦理招降亦須數日今擬於二月二十五日由巴里坤領兵前進一路探取北路大兵信息會合辦理奏入報

聞

戊寅

申諭定北將軍班第等派兵防守卡倫事宜

上諭軍機大臣曰班第據博爾貝告稱有布珠庫現在帶兵四百名來至卡倫外招摩多地方之語現

在派兵往各卡倫防守並移咨駐劄烏里雅蘇台  
大臣嚴行防範烏梁海等乃無用之人從前進兵  
時伊等但知聞風遠遁未敢侵犯現已大半聲威  
收服布珠庫一人豈有反敢侵犯之理此言不過  
布珠庫虛張聲勢冀緩我師耳原可置之不理朕  
已詳悉諭知班第令勿因此而分所進之兵力今  
此奏仍不免過於小心如為防範去年所收之烏  
梁海則伊等受朕厚恩安居度日不但不肯逃避

即使偶有逃避之人平定伊犁後自必仍來歸附  
能向何處遠颺竟可無庸派兵防守況駐劄烏里  
雅蘇台大臣現止兆惠舒赫德等數人倘因此稍  
事張皇辦理未善則喀爾喀必生畏懼即新降之  
烏梁海等亦易生疑種種殊未詳慎但班第既已  
派往且兵亦不多姑無庸深論班第惟專心辦理  
進兵之事不必以博爾貝之言為慮並傳諭駐劄  
烏里雅蘇台大臣等知之

庚辰

命治烏梁海宰桑都塔齊教唆逃人之罪

上諭軍機大臣曰班第奏烏梁海恩克什等十八戶  
潛逃請交與宰桑都塔齊嚴拏務獲侍衛六格等  
應交部議處宰桑都塔齊班珠爾應交與該扎薩  
克嚴懲治罪恩克什等逃遁明係都塔齊從前有  
覬覦管轄之意後將伊等歸與察達克管理未遂  
其意從中教唆所致班第即交與都塔齊查拏辦

理甚合如能拏獲尚可贖伊等之罪倘致脫逃必當從重治罪此時且無庸交該扎薩克懲究六格  
追趕時未曾給與多人尚屬可恕著免其交部現  
在辦理進兵之事甚屬緊要班第惟當奮勉前往  
恩克什等數人即使逃遁亦無關係況平定伊犁  
後伊等更向何處遠颺惟都塔齊人甚奸詐俟事  
定後斷不可留班第將來駐劄伊犁可告知阿睦  
爾撒納於伊回來時酌量辦理尋班第奏言據管



理烏梁海郡王品級貝勒青滾雜卜告稱恩克  
什等十八戶係久經投順之人潛行逃竄皆由  
都塔齊不能嚴行約束反從中指使所致且逃  
竄後都塔齊僅報出入戶隱瞞十戶其中更有  
可疑如此不可信之人若仍留於巴爾楚克地  
方將來新來投順人衆必為其所愚且日久自  
恐敗露必致逃竄理應將都塔齊正法以為衆  
烏梁海之戒據阿睦爾撒納亦以青滾雜卜之

言為是臣即交與青滾雜卜令其遣派妥人將  
都塔齊拏至卡倫數其罪惡即日正法以昭炯  
戒仍曉諭衆烏梁海等不得效尤亦不相牽累  
以安衆心奏入

上從之

申諭定西將軍永常協辦陝甘總督劉統勲等

上諭軍機大臣曰劉統勲奏辦理馬駝糧運情形摺  
內稱挑出瘦小不堪用及疲乏駝隻俱係上年秋

間查報堪用永常奏明收槽喂養者此處顯有推諉情弊永常係該省總督又命為將軍一切事務原係分所應辦即來京請訓往還亦僅數月該省辦理情形豈得諉為不知設使不令劉統勲前往寧能不辦耶此永常之無可推諉也至劉統勲以軍機大臣朕特派往協同辦理則永常所辦之事皆伊之事彼此本無可分設使永常獨力能辦亦不必派伊協辦矣此劉統勲之無可推諉也二者

之中永常之責較重而其不應存彼此之見則一耳況辦理此等重大事務其中小有未協惟當隨宜籌酌令於事有濟此番進兵原議在四月內今於二月先進數千尅期部署已無悞先行進剿之期若僅如肉乾等項運送稍遲不過將承辦屬員照例叅處足矣豈可以此各存意見有負朕鄭重委任之意著詳悉傳諭伊等倘再蹈前轍朕必重治其罪

癸未

申諭定西將軍永常

上諭軍機大臣曰劉統勲奏稱前奉諭旨以先進之兵約滿二千即帶領前進又准廷議續進官兵俱以二千為一起今綠旗官兵久駐軍營即應遵旨料理進發所謂先進之兵約滿二千即行前進者指索倫及滿洲京兵而言如係綠旗兵丁只可令供臺站等用若令前隊進發殊不足恃著傳諭永

常不得將綠旗官兵帶領先進且永常此番安分  
自量不妄作主張尚可邀受恩典倘因薩喇爾已  
有就緒永常急遽單身前往則必為薩喇爾等所  
笑將不能承受朕恩又為永興之續矣至馬駝等  
項永常劉統勲彼此照應辦理無致意見參差自取  
罪戾又

諭曰永常奏稱帶領現在所有綠旗及回子兵於三  
月初九日繼前隊哨探兵進發永常辦事一味草

率其急欲進兵意以事成時伊亦在彼處同有勞績耳此等意見愚而且鄙昨已降旨令伊不得僅帶綠旗官兵前進如已起程接旨後即在中途等候俟各處兵丁齊集再行進發永常係總辦軍務大臣凡一切應辦應催之事皆係其職分朕令劉統勳前往不過協辦伊任內事耳伊理應將一切事務籌畫周詳乃諸事推諉於劉統勳今急欲帶兵前進意以業已進兵則愈於伊無涉不思劉統

勲一人不但不能辦理今又將鄂昌之事交與劉  
統勲豈能兼顧永常接到此旨即將帶往綠旗官  
兵交與額林沁多爾濟帶領伊即回至肅州將陸  
續所到之兵辦給一切糧餉馬駝全行妥協起程  
有日伊然後尾行前進少有違悞斷不寬宥再策  
凌等此次行走奮勉朕是以加恩令於中途賞給  
羊隻或用肉乾此亦鼓勵戎行之意若使伊等口  
糧充裕而羊尚未到即為少緩再給亦無不可而



永常輒議令將羊隻折銀賞給試思以二千人而賞給一千餘兩之銀作何分給且現已進兵銀兩亦何所用之永常之辦理種種未協即此可見現在解往之折價銀兩既行分給不必置議仍遵原旨辦理羊隻及肉乾等項作速解往即行分給永常務遵旨辦理

叅贊大臣哈達哈等疏奏防守卡倫事宜

哈達哈等奏言大兵前進之後各處卡倫理應

嚴加防守臣等現於哈喇阿濟爾罕等處撤回  
兵內揀選一千名派喀爾喀扎薩克台吉根敦  
帶領五百名往海喇圖庫列圖哈道里科卜多  
布延圖各處駐劄防守復派喀爾喀公品級諾  
爾布扎卜領兵五百名往烏哈爾和碩等處駐  
劄防守令其時常派兵哨探並管理新舊烏梁  
海游牧以及接收來降人衆奏入報

聞

乙酉

命定西將軍永常籌運接濟軍營馬駝糧餉

上諭軍機大臣曰班第奏請續運馬駝糧餉以備接濟大兵之用朕已交軍機大臣議覆准行其西路哨探兵已於二月二十五日進發官兵各攜帶兩個月口糧並乘騎馬駝外亦應照北路預籌接濟著傳諭永常於軍營現在所有馬駝糧餉無論何項惟量其所有酌量運往以備接濟

丁亥

諭定邊左副將軍阿睦爾撒納

上諭軍機大臣曰朕因阿睦爾撒納領兵先進途中如有應奏事件令阿睦爾撒納一面具奏一面知會班第已經降旨傳諭益欲早聞伊等前途捷音耳今閱班第所奏都塔齊一事仍係阿睦爾撒納轉報因阿睦爾撒納尚未接到諭旨此等本非甚緊要之事即或咨報具奏猶屬可行第思嗣後向

前更進其信息尤欲急聞且地方情形阿睦爾撒納自較班第熟悉若必待合詞具奏不免紆迴著再傳諭阿睦爾撒納如有必須會商具奏者仍照舊辦理其有應行速為奏聞者即一面陳奏一面移咨班第庶一切事宜不致稍有遲滯

定北將軍班第疏奏驗看補放扎哈沁佐領事宜

班第奏言前遣員外郎納蘇圖等編定扎哈沁

人等旗分佐領其應放佐領人員令內大臣總  
管瑪木特保送驗看今臣經過扎卜堪地方據  
喀喇巴圖魯阿玉錫將擬放佐領之瑪什賽音  
嘉納巴克等二人送驗其餘現在軍前者俱咨  
行阿睦爾撒納驗看另報又據瑪木特保送從  
前總理九得泰事務之阿勒巴齊唐古忒一員  
請比佐領優加一等仍令照舊總理各佐領事  
務阿勒巴齊唐古忒既為瑪木特信任之人應

令其仍照舊管理事務可否賞給四品叅領職銜之處出自

聖恩臣隨諭令將扎哈沁游牧事務令阿勒巴齊唐古忒等會同臣等派出之協理台吉策凌旺舒克公同辦理加意管束奏入報

聞

戊子

上諭軍機大臣曰納默庫班珠爾齊木庫爾俱同阿

睦爾撒納領兵前進伊等俱係大員著施恩賞給  
訥默庫班珠爾三眼翎齊木庫爾雙眼翎和托輝  
特郡王品級貝勒青滾雜卜原係多年扎薩克近  
亦在軍前効力再西路進兵之策凌策凌烏巴什  
行走並屬奮勉俱著賞給三眼翎永遠服用以示  
獎勵

命定邊左副將軍阿睦爾撒納沿途籌辦投降人等  
事宜



上諭軍機大臣曰阿睦爾撒納奏來降之巴第阿咱特等告稱哈薩克錫喇帶領伊屬下向額林哈畢爾噶遷移其屬下數得秦人等及收楞額巴爾沁等俱有來降之信看來相繼來降之人必多此等望風納款即應加恩優卹但現值進兵之時無暇辦理賞賚事務著阿睦爾撒納於沿途投降人等詳悉記明在何處投降即令其住居原處不必遷徙並將功成後即行施恩之處明白曉諭此內如

金史卷八十八  
有大頭目等應帶往軍前者即行帶往其輝特都爾伯特和碩特各部落及達瓦齊所屬人等亦必陸續來降達瓦齊屬下人應另行分別辦理其輝特等所屬人應如何辦理即當預為籌畫庶臨時易於安插阿睦爾撒納即遵旨妥辦並傳諭班第及西路薩喇爾等轉諭策凌等知之

定邊左副將軍阿睦爾撒納疏奏詢問副都統察達克情形

阿睦爾撒納奏言臣等審訊烏梁海博爾貝摺  
內請將副都統察達克傳至軍前與博爾貝當  
面質對後即將博爾貝正法嗣因博爾貝瘡口  
復發於察達克未到之前已經病故臣等仍將  
博爾貝戮屍梟首外察達克前來臣等將博爾  
貝前後供詞明白曉諭據察達克告稱博爾貝  
係車根所屬之人原係不可信之小人其言俱  
屬荒唐現在準噶爾內亂無存身之地布珠庫

斷不能出兵即所言來至招摩多四百之兵亦  
係布珠庫等為瞭望蹤跡安置之數人並非敢  
來迎烏梁海等之兵且烏梁海等投順以來身  
受

天朝重恩安居樂業即車根赤倫之人我不能深信  
若我屬下之人俱可保其必無異志現在將軍  
既於扎拉圖杭吉爾察克等要害之處駐兵防  
守即使有一二不肖之徒亦於事無礙餘俟亦

倫到日俱可詳悉實在情形奏入報

聞

定邊左副將軍阿睦爾撒納疏奏揀派達什敦多卜等領兵先進事宜

阿睦爾撒納等奏言臣等於二月十二日自烏里雅蘇台軍營起程因厄魯特兵未經全到且沿途養息馬力緩行至二十四日抵庫卜克爾支放馬匹於三月初一日至齊齊克淖爾現在

金史卷八  
支放各處兵丁馬匹口糧即出卡倫前往其達  
什敦多卜察達克圖倫楚等臣等帶領行走俟  
至布拉罕察罕托輝地方遵

旨令其先進惟期早獲逃犯巴朗復派喀爾喀貝子  
策卜登厄魯特貝子得濟特協同前往奏入報  
聞

平定準噶爾方略正編卷八